



Mariane Paviasen  
Inatsisartunut ilaasortaq  
Inuit Ataqtigiit

## **Illuliornermi malittarisassat, nunatsinnilu sanaartornermut atortussialiat pillugit § 37 naapertorlugu apeqquteqaammut 2023-173-imut akissut**

13-12-2023  
Sagsnr.: 2023 - 28991  
ID. nr. 90062193

Asasara Mariane

Inatsisartut suleriaasianni § 37 naapertorlugu Illuliornermi malittarisassat, nunatsinnilu sanaartornermut atortussialiat pillugit Naalakkersuisunut apeqquteqaateqarputit. Apeqqutitit uannit akineqartussatut innersuunneqarput. Apeqqutitit matuma kinguliani ataasiakkaarlugit allanneqarput, akissummillu malitseqarlutik.

Postboks 909  
3900 Nuuk  
Tlf.: (+299) 34 50 00  
E-mail: box909@nanoq.gl  
www.naalakkersuisut.gl

### **Apeqquut 1: Naalakkersuisut Bygningsreglement-ip nutarterneqarnissaa qangali suliarisaat sumut killiffeqarpa?**

Akissut: Illuliornermi malittarisassanut nutaanut siunnersuut 2024-mi januaarimi tamanut tusarniutigineqaqqissasoq pilersaarutigineqarpoq, tamannalu malittarisassanut nutaanut siunnersuutip 2021-p aallartisimalernerani tusarniutigineqareernerani malittarisassat arlalitsigut allannguuteqarnerat pisariaqalersissimallugu. Taassumap kingorna Sanaartorneq pillugu Inatsisartut inatsisaat naapertorlugu Namminersorlutik Oqartussat nalunaarutaatigut, illuliornermi malittarisassat nutaat 2024-mi juulimi atuutsilersinneqassasut naatsorsuutigineqarpoq.

Silap pissusiata allanngoriartornera, CO<sub>2</sub>-millu aniatsitsinerup annikillisinneqarnissaanik siunertaqarlutik suliniutit inuiaqatigiinni nalinginnaasumik eqqumaffigineqarnerulernerat, illuliornermi malittarisassat allanngortinneqarnissaannut patsisaavoq. Tamatumani illuliornermi sanaartornernilu, nukissiuutinik annertuumik atuiffiusut ilanngullugit.

Illuutini nutaannginnerusuniinnangitsiq, aammali nutaani illup iluani silaannaap isugutattarnera, malitsigisaanillu illup oqoqalersarnera unamillernartoqarpoq.

Naatsumik oqaatigalugu illuliornermi malittarisassani tulluuttut allannguutaassapput:

- Illuliani nutaani nukimmik atuineq 25-30 procentimik annikillisussanngorlugu kiassaanermut nukimmik atuinermit, silaannarissaanermullu piumasaqaatit sakkortusineqassapput.
- Sanaartukkanik pioreersunik allanngortiterinermi nukimmik atuinermit sipaaruteqalernissamik kinguneqartussanik suliaqartoqasassoq piumasaqaateqalissaaq.
- Illuliat, sanaartornermilu atortut iserternermi oqoqalissutaasinnaasumik isugutassuseqassanngitsut piumasaqaataalissaaq.
- Inissiani, unnuisarfinni, ilinniartut inaanni il.il. ikuallattoqarneranik kalerrisaarutit innaallagissap aqqutaanut attavilerneqarnissaannik piumasaqaataalissaaq.

- Eurocodes-inut ilanngussat Kalaallit Nunaannut atuutsilersinneqarnerisigut pilersaarusiornissamut, sanaartornermut, sanaartukkanillu nakkutiginnissamut tunngaviit nutarterneqassapput.
- Sanaartukkani nutaani najummissut imaannaangitsumik ajutooratarsinnaatillugit sanaartukkat siunnersortinit siunnersortitut allagartalinnit pilersaarusiorneqarlutillu, nakkutigineqarnissaat pillugu piumasaqaat siunissami (massakkut ukiut marluogallartut) atuutsilersinneqassaaq.

Suliniutit taakkua sanaartukkani nutaani, sanaartukkap ukiuni piusinnaanera isiginiaraanni aningaasartuuteqarfiussanngitsut naatsorsuutigineqarpoq.

**Apeqqu 2: Naalackersuisut nunatsinni sanaartornermut atortussianik salliussillutik sanaartornermik ingerlatsisoqartalernissaannut aqqutissiuusissallutik iliuutsit suut aallartisarniarpaat?**

Akissut: Inatsisartut 2021-p ukiaani (UKA 2021/106) aamma 2022-p upernaani (UPA 2022-106) ataatsimiinnerminni isumaqatigiinniareerlutik aalajangiinerat naapertorlugu, nassuiaat *"Kalaallit sanaartornermut atortussiaannut tunngavissarititaasut"* Inatsisartunut ilaasortanut 2022-mi novembarimi agguaanneqartoq innersuussutigineqarpoq<sup>1</sup>.

Namminersorlutik Oqartussat inissialionerini nunatsinni sanaartornermut atortussialianik sapinngisamik atuinerpaanissamut suliniuterpaaluit, misilittagaasullu nassuiaammi allaatigineqarput.


Nunatsinni sanaartornermi sanaartornermi atortussianik eqquussisariaqarneq sapinngisamik annikillisikkumallugu, nunatsinni sanaartornermut atortussialianik sapinngisamik atuinissaq Naalackersuisut pingaartitorujussuaat.

**Apeqqu 3: Siku-Block-ip ingerlariaqqinnissaannut Naalackersuisut aqqutissanik tikkuusisinnaasuseqarpat? Taamaappat suut tikkuusinnaavaat?**

Akissut: Aningaasanut inatsit aqqutigalugu inuussutissarsiornermik siuarsaanissamut aaqqiissutinik atorluanaanissaq, Naalackersuisut aallarnisaasunut innersuussutigisinnaavaa. Tamatumani tunisassiamik ineriartortitsinissamut tapiissutit, massakkut Nalik Ventures-imit aqunneqartut [<https://nalik.gl>] periarfissat ilagaat. Assersuutigalugu sanaartornermi atortussianik ineriartortitsinissamut, tunisassiulernissamut il.il. aaqqiineq taanna aqqutigalugu tapiiffigineqarnissaminnik qinnuteqarnissaminnut aallarnisaasut tamarmik assigiimmik periarfissaqarput.

Neriuppunga qulaani allaqqasuni apeqquteqaatitit akineqartut.

Inussiarnersumik inuulluaqqusillunga



Hans Peter Poulsen

<sup>1</sup> <https://naalackersuisut.gl/Publikationer?types=49ab77c3-e221-48b6-82b1-f972e17d62ab&subjects=d4a214bd-28dd-4a5d-97f8-a85d15cfd8bb&page=1&dates=&sc lang=kl-GL>